

1 PITER

(The First Epistle General of Peter)

Lawk karouknae

¹ Kai Piter, Jisuh Khrih e guncei lah kaawm e ni, Pontus, Galati ram, Kappadosia ram, Asia ram hoi Bithunia ramnaw hoi kho tangkuem ka kampek e, Cathut ni a rawi e imyin lah kaawm e nangmouh koevah ca na patawn awh. ² Jisuh Khrih a thi kaheinae hoi, Muitha lahoi thounsaknae hmu hanelah, Pa Cathut ni sut a panue tangcoung e patetlah, a rawi e taminaw nangmouh koe a lungmanae hoi roumnae teh pungdaw lawiseh.

Kahring e ngaihawinae

³ Maimae Bawipa Jisuh Khrih e Pa Cathut teh yawhawinae awm lawiseh. Bawipa ni amae ka lentoe poung e a pahrennae hoi Jisuh Khrih duenae koehoi bout thawsaknae lahoi maimouh teh kahring e ngaihawinae dawkh thoseh, ⁴ nangmouh hanelah kalvan kho vah a hruek e, kamkona, khinnae, kamyainae kaawm hoeh e râw dawkh thoseh, katha lah bout na khe sak awh toe. ⁵ Nangmouh ni ahnoungepoung e tueng dawkh coungkacoe kamnue hane runngangnae hah Cathut e bahu dawkh yuemnae lahoi na kountouk awh. ⁶ Nangmouh ni atu e atueng dawkhvah tanouknae hoi lungmathoenae

a cawngca dawngdeng na kâhmo aw h ei nakung-hai, a lathueng lah ka dei tangcoung e patetlah konawmnae kalenpoung tawn aw h. ⁷ Hotnaw teh, hmai hoi tanouk e lah o tangcoung eiteh kamko thai kawi e sui h lak aphu kaawm poung e nangmae yuemnae hah tanouknae teh Jisuh Khrih a kamnue toteh, pholenna, bawilenna hoi barinae lah na hmu aw h han. ⁸ Nangmouh ni hote Bawipa teh na hmawt bawi aw h hoeh eiteh lung na pataw aw h. Hote Bawipa teh atu na hmawt aw h hoeh eiteh na yuem aw h toe. Lawk hoi deithailekhoeh e konawmnae lahoi a bawilenna teh pholen aw h. ⁹ Lungthin muitha rungngangnae yuemnae aphu hah a hmu aw h.

¹⁰ Nangmouh ni na coe hane lungmanae hoi kâkuen lah ka dei e profetnaw nihai rungngangnae a kong a la tawng aw h toe. ¹¹ Nangmouh thung kaawm e Khrih e Muitha ni Khrih rektapnae hoi, hote rektapnae hnuklah ka tho hane a bawilenna akong hah sut kampangkhai aw h navah, apimaw, hoehpawiteh nâtuék e atueng maw a dei ngai nah tie hah ahnimouh ni a la tawng aw h toe. ¹² Hatnavah, ahnimouh ni a sak e hnonaw teh amamouh hanelah tho laipalah, nangmouh hanelah ahnimouh koe a pâpho. Atu hote hnonaw teh kalvan lahoi a patoun e Kathoung Muitha lahoi kamthang kahawi kadeinaw koehoi nangmouh koe bout pâpho e lah ao toe. Kalvantaminaw ni patenghai yah hote hnonaw a hmu hanelah puenghoi a ngai aw h.

Hringnuen thoung nahanlah hroecoenae

¹³ Hatdawkvah, nangmae na lungthin hah kâraukueng nateh kâhruetcueth awh. Jisuh Khrih a kamnue toteh nangmouh koe ka tho hane yawhawinae hah apout ditouh ngaihawi awh.

¹⁴ Yampa vah nangmouh ni na thai panuek awh hoeh nah lungradueknae hno na pâlei e naw atu bout pâlei laipalah lawk ka ngai e camo patetlah o vaiteh, ¹⁵ nangmouh na kakaw e Bawipa a thoung e patetlah nangmouh hai na hring kho na saknae dawkwah thoungsak awh.

¹⁶ Bangkongtetpawiteh, kai kathoung dawkvah nangmouh haiyah thoungnae tawn awh, telah Cakathoung dawkwah a dei.

¹⁷ Nangmouh ni tami e minhmai khen laipalah buetbuet touh tangkuem ni a sak e patetlah lawk-cengkung hah Apa telah na kaw awh pawiteh het talai imyin lah na o nathung barinae lungthin hoi khosak awh. ¹⁸ Bangkongtetpawiteh, nangmouh ni mintoenaw koehoi na coe e ayawmyin kho na saknae thung hoi na ratangnae teh sui ngun kamko thai e hno hoi nahoe, ¹⁹ Yonnae banghai ka tawn hoeh e, khinnae ka tawn hoeh e tuca patetlah e aphu kaawm poung e Khrih thipaling hoi na ratang e titeh panue awh. ²⁰ Bawipa teh talaivan a sak hoehnahan sut a hmoun tangcoung e lah ao eiteh, atu ahnoungepoung e atueng dawkvah nangmouh hanelah a kamnue toe. ²¹ Nangmouh ni Cathut khet laihoi yuemnae, ngaihawinae tawn thai nahanelah hote Bawipa hah Cathut ni duena koehoi a thaw sak teh bawilenna a poe toe.

²² Nangmouh teh, lawkkatang ngâi e lahoi, nangmae lungthin muitha hah a thoung a cai

sak teh, a katang e hmaunawnggha reira lung-patawnae na coe awh dawkvah, kathounge lungthin hoi buet touh hoi buet touh kacaklah lungkâpataw awh. ²³ Nangmouh teh kamko thai e cati hoi tho laipalah, kamko thai hoeh e cati, kahring niteh a yungyoe kangning e Cathut e a lawk hoi a katha lah khe e lah na o awh. ²⁴ Bangkongtetpawitech miphun pueng teh phokung patetlah doeh ao awh. Taminaw e lentoenae pueng haiyah pho pei patetlah lah doeh ao. Phokung teh a kamyai teh a ke thai. A pei haiyah a sarut thai. ²⁵ Hatei, Cathut e a lawk teh a yungyoe a kangning. Hote a lawk teh nangmouh koe dei e kamthang kahawi doeh.

2

Kahring e talung, kathounge miphun

¹ Nangmouh teh Bawipa Cathut e lungmanae na patek toung dawkvah, ² Utsinnae cawngca, dumyenna, tami kahawi lah kâsaknae, kâhmuhmanae, kâpathoenae pueng pahnawt awh nateh, rungngang nahanelah muitha sanutui katang hoi rounng hanelah, ³ camosen patetlah hote sanutui hah ngainae hoi kahran awh haw.

⁴ Taminaw ni a pahnawt awh teh Cathut ni a rawi e hringnae talung tie hote Bawipa koe pha teh, ⁵ kahring e talungnaw patetlah patuenpatuen pacoung teh sak e muitha koe lae im lah o awh. Jisuh Khrih lahoi Cathut ni a ngai e thuengnae ka sak hane kathounge vaihma miphun lah o awh. ⁶ Cakathoung dawka thut e patetlah rawi e im takinlung aphu kaawm e

hah Zion mon dawk ka ta. Hote talung ka kâuep e naw pueng teh kayanae tawn mahoe h telah ati. ⁷ Hatdawkvah hote talung teh kayuemnaw hanelah a lentoenae lah ao. Kayuemhoehnaw hanelah teh im kasaknaw ni a pahnawt a eiteh im tungkhu takin koe ka phat e talung lah ao. ⁸ A lawk kangâihoehnaw hanelah teh hote talung teh tâlawnae talung hoi payonnae lungsong lah ao. Hottelah ao nahanelah ahnimouh teh a rawi e lah ao.

⁹ Nangmouh teh a hmonae koehoi kângairu angnae dawk na kakawkung Amae pholennae kamnue sak hanelah rawi e miphun lah na o aw h. Siangpahrang vaihma miphun, kathounge miphun, Cathut e miphun katang lah na o aw h. ¹⁰ Yampa vah nangmouh teh Cathut e miphun lah na aw m aw h hoe h. Atuteh Cathut e miphun lah na o aw h. Yampa vah a lungmanae na coe aw h hoe h eiteh atuteh na coe aw h toe.

Hnokahawi sak nahan hroecoenae

¹¹ Ka lungpataw e taminaw, nangmouh teh imyin lah na o aw h teh Muitha ka taran e takthai radueknae hah roun hanelah na hroecoe aw h. ¹² Jentelnaw e rahak vah khet kamcu lah khosak aw h. Hottelah kho na sak aw h pawiteh ahnimouh ni nangmouh teh yon ka sak e tami lah na dei nakunghai nangmae h nokahawi na sak e naw a hmu toteh, Cathut hmalah Bawipa e bawilennae teh a pholen aw h han.

¹³ Bawipa e minhmai khet laihoi ka lentoe poung e siangpahrang nakunghai thoseh, tami kahawi oup hanelah thoseh, ¹⁴ Siangpahrang ni a rawi e kâ katawnnaw thoseh, taminaw

koe khokhangkung bawinaw e hrawinae lawk ngâi awh. ¹⁵ Bangkongtetpawiteh nangmouh ni hnokahawi na sak e lahoi tami pathunaw e pathunae lawk rakhip thai nahanelah Cathut ngainae lah ao. ¹⁶ Tami kahloutnaw patetlah hring awh. Hatei hote hloutnae hah kahawihoe h sak nahanelah hno laipalah Cathut e a san patetlah kâroe awh. ¹⁷ Tami pueng hah bari awh. Hmaunawngaha hah lungpataw awh. Cathut hah taket awh. Siangpahrang hah bari awh.

Bawinaw koe lawkngainae

¹⁸ Sannaw, takinae lahoi na Bawipa e hrawinae ngai awh. Bawi teh lungthin kahawi hoi lungdonae ka tawn nakunghai thoseh, a lungthin ka muenyang e hai thoseh, a lawk ngâi pouh awh. ¹⁹ Cathut e minhmai khet laihoi kathuem hoe h e rektapnae na khang nakunghai yawhawinae ao. ²⁰ Ma e yon kecu daw k hemnae khang boipawiteh bangmaw oup hane kawi kaawm. Hnokahawi na sak nahlangva vah, rucatnae na khang pawiteh Cathut koe yawhawinae ao. ²¹ Bangkongtetpawiteh, hot patetlah hane doeh nangmouh teh kaw lah na o awh teh, Khrih ni mamouh hanelah a khang teh, a khokhnuk dawn vaiteh khetsin hane kawi mitnoutnae na ta pouh toe. ²² Hote Bawipa teh yonnae sak hoe h, apâhni daw k hai laithoe awmhoeh. ²³ Pathoenae a khang navah, bout pathung hoe h. Rucatnae a khang na haiyah pakhi laipalah, kalan lah lawkcengkung koe amahoima a kâhnawng toe. ²⁴ Maimouh teh yon hoi ka kâkuen e naw koe lah due awh teh lanna e koelah na hring sak hanelah

maimae yonnae hah ama roeroe ni a tak thung thing dawk a sin toe. A hemnae hmâtannaw dawk hoi nangmouh teh na dam awh toe. ²⁵ Nangmouh teh lam ka phen e tu patetlah na o awh. Atuteh Tukhoumkung lah kaawm e, nangmae lungthin muitha kakhenyawnkung, Bawi koe bout na pha awh toe.

3

Yuvâ ni tarawi hane kawi

¹ Hot patetvanlah, napuinaw, na vâ naw e lawk ngâi awh. Hottelah na tet awh pawiteh, na vâ naw ni a lawk a ngâi awh hoeh nakung-hai, ² nangmae Cathut takinae hoi kathounge hringnuen hah hmawt awh vaiteh, nangmae lawk dawk hoi laipalah, na hringnuen lahoi a lungkâthung awh han. ³ Nangmouh dawk kamthoupnae, samveinae, sui dingyin awinae, khohnanae tie naw alawilae kamthoupnae hoi laipalah, ⁴ Cathut hmalah apfu kaawm poug e lungdonae tie karawk thai hoeh e kamthoupnae hoi a thung lae tami lah awm awh. ⁵ Cathut kâuep e napuinaw teh ayan vah hot patetlah amahoima a kamthoup awh. ⁶ Sarah ni Abraham teh bawipa telah a kaw teh ahnie a lawk a ngâi e patetlah, vâ e lawk hah ngâi awh. Nangmouh ni kahawicalah na sakyoe awh teh tâsuenae tawn laipalah na awm pawiteh, Sarah e canu lah na o awh.

⁷ Hot patetvanlah, vanaw, na yu hah bari awh. Yu teh a tha ka youn e lah ao tie hah panue nalaihoi hringnae râw rei ka coe e lah pouk awh, apfu awm sak awh nateh reirei khosak

awh. Het hateh nangmae ratoumnae rakhout hoeh nahane doeh.

Kahawi hoeh e sak awh hanh.

⁸ A hnuktengpoung lah dei han tetpawiteh, nangmouh pueng ni lungkângingcalah awm awh. Lungkâpatawnae, hmaunawnggha patetlah kâpahrennae, kârahnoumnae tawn awh.

⁹ Nangmouh teh yawhawinae râw na coe awh nahanelah, kaw e tami lah na o awh dawkvah, kathout hno hah hno kathout hoi, yuenae hah yuenae lahoi pathung awh hanh. Yawhawinae mah poe awh.

¹⁰ Bangkongtetpawiteh hring nawmnae lungpataw niteh, hnin kahawi hoi kâhmo hanelah ka ngai e tami teh amae a lai hah cakuep vaiteh kahawihoehe lawk hoi kâhlat naseh. A pahni hoi laithoe hai dei hanh naseh.

¹¹ Kahawi hoeh e hno roun vaiteh hnokahawi sak naseh. Ayânaw hoi kâpocalah khosak naseh.

¹² Bangkongtetpawiteh Cathut e tami kalannaw hah khetyawt teh ahnimae ratoumnae hai a thai pouh. Hatei kahawihoehe ka sak e taminaw teh Cathut ni minhmai athung takhai.

Lannae kecu dawkh khang hane runae

¹³ Nangmouh teh hnokahawi ka sak e tami lah na awm awh pawiteh apinimaw runae na poe awh han.

¹⁴ Lannae kecu dawkh reithainae na khang pawiteh na yawhawi awh, ahnimae pakhinae taket awh hanh awh, kalue awh hanh awh, ¹⁵ Na lungthin hoiyah Bawipa hah barinae tawn awh. Nangmae ngaihawinae hno hah na ka pacei e taminaw pueng koe lungdonae lungthin hoi bout na dei thai nahanelah coungkacoe

lah awm awh. ¹⁶ Khrih thung nangmouh ni hnokahawi na sak awh e hah kahawihoeh lah kadeinaw ni yon na pen awh nah amamouh yeiraipo nahanelah nangmouh teh namahoima ka panuenae lungthin kathoungcalah awm awh. ¹⁷ Cathut e ngainae lah awm pawiteh hnokahawi sak dawk reithai khangnae teh kahawihoehe saknae dawk reithai khang e hlak hoe ahawi. ¹⁸ Bangkongtetpawiteh Khrih hai yon kecu dawk runae vai touh hoi kakhoutlah a khang. Nangmanaw Cathut koe na thak nahanlah tamikalan ni tamikalanhoehnaw hanlah runae a khang toe. Ama teh takthai koe lahoi kadout ei nakunghai, Muitha koe lahoi hring sak lah ao dawkvah, ¹⁹ Muitha lahoi a cei teh thong thung paung e muithanaw koe phung a dei. ²⁰ Hote muithanaw teh ayan Noah senae, tami kayounca tami taroe touh tuikamuem dawk hoi ratang nahane long a sak awh navah, Cathut ni lungsaw laihoi a ring eiteh lawk ka ngâi hoeh e muithanaw doeh. ²¹ Hote bangnuenae patetlah atu e baptisma teh Jisuh Khrih a thawnae lahoi maimouh na rungngang awh. Baptisma tie teh takthai khinnae pâsu e dei ngainae lah tho hoeh. Ma hoi ma kâpanuenae lungthin a thoung teh Cathut hmalah ue tinae doeh. ²² Hote Bawipa teh kalvan kho a luen teh kalvantaminaw, kâtawnnae hoi bahu onae hah a uk teh, Cathut e aranglah ao.

4

Khrih hnuk kâbangnae

¹ Hottelah Khrih ni maimouh hanelah a tak hoi a khang katang dawkvah nangmouh hai

hot patetlah e lungthin pouknae hah sene lah hno aw. Bangkoktetpawiteh a tak dawc rucac ka khang e tami teh yonnae dawc hoi a hlout toe. ² Takthai dawc hringkhai hane kaawm rae atueng dawc bout hring hanelah taminaw e radueknae lahoi tho laipalah Cathut e ngainae lahoi a hring thai nahane doeh. ³ Bangkoktetpawiteh Jentelnaw patetlah hring aw. teh, takngai pâleinae, radueknae, yamuhrinae, nawm ngainae, carawngcakhanae, meikaphawk bawknae dawkvah kaloum tangcung e tuengnaw dawc khosak aw. e teh maimouh hanelah a khout toe. ⁴ Talai nawmnae dawc ahnimouh hoi na kâhuikohoeah hah ahnimouh ni a kângai a ru teh na pathoe aw. ⁵ Hatdawkvah, kahringnaw hai thoseh, kadoutnaw hai thoseh, lawkceng hanelah cungkacoe na ka ring e hmalah ahnimouh ni a kâpâpho aw. han. ⁶ Taminaw e a hmalah yon lawkcengnae a tak hoi a khang nakunghai thoseh, Cathut hmalah lungthin muitha lahoi hring hanelah kadoutnaw ni kamthang kahawi a thai aw.

Ahnoungpoung e tue tami oangnaw

⁷ Hno cawngca pueng heh a pout tawmlei toung dawkvah kâhruetcuat aw. Ratoumnae lahoi ring aw. ⁸ Lungpatawnae ni yonnae moikapap a ramuk thai dawkvah bangpueng hlakvah buet touh hoi buet touh rahak vah lungpatawnae caksak aw. ⁹ Phuenangnae tawn laipalah buet touh hoi buet touh im luen hane kâpasoung aw. ¹⁰ Nangmanaw ni na coe aw. e poehno tawc thainae thaw lengkaleng na coe aw. dawkvah, Cathut e hnopai ka kuem

e patetlah buet touh hoi buet touh hote thaw tawk thainae lahoi lengkaleng kâ kabawm aw. ¹¹ Cathut teh bang pueng daw. Jisuh Khrih lahoi a bawilennae a kamnue thai nahanelah, ka pâpho e ni Cathut ni dei e patetlah dei naseh. A thaw ka tawk e ni Cathut ni a poe e thaonae patetlah tawk naseh. Hote Bawipa teh bahu hoi bawilennae a yungyoe awm lawiseh. Amen.

Khrih e taminaw ni a khang hane kawi runae

¹² Ka lungpataw e naw, nangmouh noum-cai nahanelah nangmouh koe ka tho e runae hmai hoi tanouknae teh kângairu kawi patetlah kângairu aw hanh. ¹³ Nangmouh teh Khrih e reithainae na hmawngkhai aw dawkvah kon-awm aw. Khrih e bawilennae a kamnue toteh na lunghawi aw nahane doeh. ¹⁴ Jisuh Khrih min kecu daw pathoenae na khang pawiteh yawhawinae ao. Bangkongtetpawiteh, Cathut e ka lentoe e Muitha teh nangmouh thungvah ao. Ahnimouh hane teh pathoenae, nangmouh hanelah teh pholennae lah ao. ¹⁵ Nangmouh thung dawkvah tami ka thet e, kaparawte, kahawihoehe hno ka sak e, ayânaw e kamcan daw kambawng e, nangmouh daw apihai awm sak aw hanh. ¹⁶ Khristen lah na o aw dawkvah na khang pawiteh, kayak aw hanh, hatei a min lahoi Cathut pholen naseh. ¹⁷ Cathut e imthungkhunaw hmaloe pasuek lawkcengnae tueng a pha toe. Hottelah maimouh koehoi hmaloe pasuek lawkceng hoehpawiteh, Cathut e kamthang kahawi ka thai ngaihoehnae e kamcan teh bangtelamaw abaw thai han vaw.

¹⁸ Tami kalan ni rungngang lah ao hane ru paw-iteh Cathut ka bawk hoeh e naw, tamikayonnaw teh bangtelamaw ao awh han.

¹⁹ Hatdawkvah, Cathut e ngainae patetlah a rucacat ka kâhmo e taminaw teh hnokahawi a sak awh navah, mae hringnae hah lawkkam kacakpoung na kasakkung koe poe naseh.

5

Kacuenaw hoi kanawnaw thapoenae

¹ Kacue lah kaawm niteh, Khrih e reithainae ka kampangkhai e lah kaawm e, kamnuek hane Bawipa e a bawilennae kahmawng hane kai, Piter ni nangmouh thung dawc e kacuenaw hah na hroecoe awh. ² Nangmouh hoi rei

na kaawm e Cathut e tuhu hah na khoum e hno dawc, na khoum thai dawc nahoe, kathounghoehe hnopai ngai dawc hai nahoe, lungthin thonae tawn hoiyah khenyawn awh.

³ Bawinaw ni kâawwnae lahoi uk laipalah tuhu hmalah khetsin kamcu e tami lah awm awh.

⁴ Hottelah na sak pawiteh, Tukhoum kalen a tho toteh nangmouh teh kamyai thai hoeh e bawilennae bawilukhung na hmu awh han.

⁵ Hot patetlah kanawnaw, kacuenaw e lawk hah ngâi awh. Hothloilah buet touh hoi buet touh kârahnoum awh nateh lungdonae puengcang kâmahrawk awh. Bangkongtetpawiteh, kâoupkâpawi e taminaw teh Cathut ni a cakâ. Lungthin kârahnoum e taminaw teh yawhawinae a poe. ⁶ Hatdawkvah atueng a kuep toteh Cathut ni nangmouh teh na oup awh nahanelah thaonae kut rahim vah namahoima kârahnoum

awh. ⁷ Nangmouh takuetluet na khet dawkvah, nangmae tâsuenae hnonaw pueng Bawipa koe poe awh.

Pâpoutnae

⁸ Kâhruetcuets hoi ip laipalah ring awh. Nangmae taran lah kaawm e kahraimathout teh ka huk e sendek patetlah apimaw ka padoun han telah yuengyoe a tawng. ⁹ Hatdawkvah, talaivan dawkaawm e hmaunawngghanaw hah hot patet e reithainae a khang aw h telah pouk nateh yuemnae dawkvah kacakcalah awm aw h nateh ahni hah ngang aw h.

¹⁰ Khrih Jisuh lahoi maimouh yungyoe bawilenna koe lah na ka kaw e, bangpueng dawkaawmae ka sak e, Cathut ni dawngdengca reithai ka khang tangcoung e nangmanaw hah na kuep sak aw h vaiteh, thaonae hoi na kawi vaiteh pou na caksak aw h han. ¹¹ A thaonae teh a yungyoe ama koe awm lawiseh. Amen. ¹² Kai ni nangmanaw teh tha poenae lahoi na coun aw h teh nangmouh ni na kâuep aw h e hnonaw hah Cathut e yawhawinae katang doeh telah panuek aw h. Hete ca teh kaduemcalah ka thut teh, nangmouh koe yuemkamcu e hmaunawnggha Silvanas koehoi patuen na patawn aw h. ¹³ Ka ca, Mark hoi Babilon khopui dawkaawm e nangmouh hoi cungtalah rawi lah kaawm e ni nangmouh kut na man aw h. ¹⁴ Buet touh hoi buet touh lungkâpataw lahoi kâpaco aw h. Khrih Jisuh thung e roumnae teh nangmouh abuemlah koe awm lawiseh. Amen.

Thai Phum Holy Bible **The Holy Bible in the Thaiphum Chin language of** **Myanmar**

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-12-08

PDF generated using Haiola and XeLaTeX on 11 Nov 2022 from source files dated 30 Nov 2021

84c7fe95-3b68-5ab6-b17e-a642d33ac078